

lis Gnovis

■ **PINÇAN.** Come un templi tal paisaç

Ancje la celebrazion dai soldâts «muarts pe patrie», inte Gjermanie dai agns dal Trente dal Nûfcent, e veve di zovâi a la militarizazion progressive de societât. Par chel, la clape «Volksbund Deutsche Kriegsgräberfürsorge», in chei timps, e invià la progjetazion di 5 «Memoriâi», par dâur la volte ai vieris cimiteris di vuere dai Pais dulà che l'esercit prussian al veve scombatût la vuere dal '14-'18. In Italie, a forin sielzûts chei di Feltre, di Quero, dal Pordoi e di Pinçan, dulà ch'al veve di jessi realizât il plui grant di ducj. Chel «Cjiscjel dai muarts», ad ôr dal Tiliment, fra i vanzums fuarteçâts di Ruvigne e di Pinçan, nol fo mai finit ma al diventà plui tart une part dal sisteme difensif de vuere frede. La sò storie e ven contade te mostre «Il sacrario sul Tagliamento e i Totenburg germanici nel paesaggio italiano (1936-1943)», imbastide li dal mulin di Borc dal Pian di Moreno Baccichet e di Annalisa Marini. E restarà vierte fintremai ai 20 di Otubar, proferint ancje i progjets pal recupar, dopo che il comprensori al è passât sot dal Comun.

■ **UDIN.** L'Europe des lenghis

«Il Friuli delle lingue nell'Europa delle lingue»: e je la cuistion ch'è vignarà tratade, ai 28 di Setembar, intant de convigne immaneade dal Centri di documentazion europeane «Guido Comessatti» de Università parie cu la Cooperative «Informazione Friulana», par celebrà la «Zornade europeane des lenghis». Il confront sul plurilinguism al començarà a 10.15 li di palaç di Toppo-Wassermann, tal Borc di Glemona, a Udin. La riflession, po, e larà indevant dai 23 di Setembar ai 4 di Otubar, mediant des trasmissionis radiofonichis «Europe/Europa: Lenghis, Jeziki, Sprachen, Lingue», programadis di «Radio Onde Furlane» ai 23, ai 24 e ai 25 di Setembar; joibe ai 26 di Setembar a 8.30, cun replichis a 17 e po vinars ai 27 a 16; e ai 2 di Otubar, cun replichis ai 3 a 17 e ai 4 a 16 (90 MHz e 90.2 MHz; www.ondefurlane.eu).

■ **TARVIS.** Une zornade pai boscs

Il Forest Stewardship Council («Fsc»), vinars ai 27 di Setembar, al organize la fieste internazionâl de gjestion forestâl sostignibil, ch'è je stade batiade «Fsc Friday» (www.fscfriday.fsc-italia.it). Chest an, a son bielzà ingaiâts passe 60 Pais dal mont, dulà ch'a saran imneadis celebracions e manifestazions. «In grazie di Fsc Friday si podarà rifletti sui servizis che i boscs a ufrissin in mût naturâl, come len, cjarte, mangjative, aiar e aghe, e si podarà imparà trop che la certificazion Fsc e po judà par protezi chest patrimoni», al à declarât il diretôr di «Fsc Italia», Diego Florian.

■ **RESIE.** Riflessions su la crisi climatiche

Il professôr Davide Pettenella, preseât economist forestâl de Università di Padue, dulà ch'al opere tal Dipartiment «Territorio e Sistemi agro-forestali», al publiche tal so lûc internet (intra.tesaf.unipd.it/pettenella/) i ristrets di ducj i siei intervencs publics. Fra i ultins, a 'nd è doi presentâts in Friûl. Su «Le risorse ambientali tra ecologia, economia e politica» al à cjacarât a Cjastelir di Pagnà, ai 6 di Setembar; e su «Boschi e cambiamenti climatici: siamo preparati?» al à fevelât a Prât di Resie/Ravanca, ai 22 di Lui, cun Nicola Andrighetto, Alex Pra e Mauro Masiero.

Joibe 26	Ss. Cosme e Damian	Lunis 30	S. Jaroni
Vinars 27	S. Vincenç de' Pauli	Martars 1	S. Taresie
Sabide 28	S. Venceslau re	Miercus 2	Ss. Agnui custodis
Domenie 29	Ss. Arcagnui G.M.R.	Il timp	Bondantis plois e fresc



Il soreli
Ai 26 al iève aes 6.58 e al va a mont aes 18.58.

Il proverbi
L'om nol vif nome cul pan.



La lune
Ai 28 Lune gnove.

Lis voris dal mès
L'ort si invie viers la polse dal Invier. Si plantin artijocs, bulbis di cevole, spics di ai.

Pan e inovazion

A Tombe, la prime fieste «Non solo Pane - Nutrire Comunità»

Pan, Comunità e Inovazion sociâl: a son i trê ingredients de prime edizion da la fieste «Non solo Pane - Nutrire Comunità», programade dal Distret di Economie solidarie «Friûl di Mieç» e de Aziende agricole «Roselli della Rovere», domenie ai 6 di Otubar, a Tombe di Merêt.

Par dut il dopomisdì, di 3 fin 8 di sere, si podarà visitâ il «Marcjât dai produtôrs locâi» e la «Mostre des buinis pratichis», ch'a smirin di «sensibilizâ e di ativâ la int di ch'è part di Furlanie te costruzion di un'Economie di Comunità, inlidrisade tai principis de solidarietât, de mutualitât, de sostignibilitât ambientâl, de coesion sociâl e de curie dai Bens comuns», ch'a son chei istès valôrs ricognossûts ancje te leç regionâl 4 dal 2017 «Norme per la valorizzazione e la promozione dell'economia solidale». La fieste dai 6 di Otubar, di une bande, e puarte indevant la tradizion inviadè di un pôcs di agns incà dai roncârs Emmanuelle e Cristiano Roselli della Rovere par celebrâ la fin de vendeme cuntune ocasion di condivison, di ringraziament e di fieste (www.rosellidellarovere.it). Di ch'è altre, e intint di svilupâ i obietifs strategjics dal Progjet dal Distret di Economie solidarie «Friûl di Mieç», prudelât de Università e di «Friuli Innovazione», «Non solo Pane», ch'al è jentrât fra lis trê miôr propuestis d'«inovazion sociâl» ideadis in Friûl e a Triest, daûr dal concurs internazionâl «Social Impact for the Alps Adriatic Region - Sia».



I prodots dal Distret di Economie solidarie «Friûl di Mieç»

Il fin dal apontament dai 6 di Otubar al è chel di valorizâ i produtôrs locâi e di confrontâ lis azions plui positivis par creâ un'Economie comunitarie e solidarie

Li dal bearç di cjase Roselli della Rovere (ancje s'al ves di jessi trist timp), il program al proponarà leturis e ativitâts par fruts, par cure des clapis dal teritori (tacant a 15.30) e il concerti pe fin de vendeme par «Trio d'Archi», cui musiciscj Nicoletta e Francesco Pinosa e Edoardo Venuti, a 17.30. Par dut il timp de fieste, a saran a Tombe i puarteçâts dal «Banco Alimentare», par realizâ une «Cuestule alimentâr straordinarie», par che ducj i aventôrs a puedin donâ mangjativis par fruts, scjatulis di ton e di cjâr, vueli e vie indevant. Partint di 3 dopomisdì, i

agricultôrs dal Friûl di Mieç a proferiran mil, farine, paste, formadis e ortae des sôs campagnis e i artesans a ufrissaran i prodots dal lôr inzen. Te organizazion, cul «Des Friûl di Mieç» e cu l'Aziende «Roselli della Rovere», a son ingaiâts ancje la «Pro Loco Tomba di Mereto», il «Consorzio fra Pro Loco Medio Friuli» e la clape «Tombini Aperti». Informazions su la manifestazion a podaran jessi buridis fûr mediant de direzion eletroniche nutrirecomunita@gmail.com e su la pagine «Facebook»: «Non solo Pane - Nutrire Comunità».

Mario Zili

Al è pront il «Curriculum uficiâl european» par furlan

Pe promozion des competencis scolastichis e professionâls, te Union europeane, al funzione dal 2012 il «Curriculum vitae european», curât di «Europass», pe Direzion Istruzion e Culture. Tal lûc internet, dulà ch'al è proferit il servizi internazionâl, si cjate di un pôcs di dis ancje il modul par furlan. Al è stât prontât di «ARLeF» (Agenzie regionâl pe lenghe furlane), te suaze dal «Portfolio European des Lenghis», svilupât dal Program di politiche linguistiche de Union europeane par favorî l'autonomie dai students, il plurilinguism e lis competencis interculturâls.

Peraulis in dismentie par cure di Mario Martinis

DISPITICÂSI

v. = soddisfare una propria voglia, un proprio desiderio (formato da spiticâ e dal prefisso rafforzativo dis-, verosimilmente da *spiticare, continuatore del latino spicâre "crescere in forma di spiga; aguzzare")
E daspò che tu ti sarâs dispiticât, ce varâstu?
E dopo che ti sarai tolto la voglia, cosa te ne verrâ?

DISPOSSENT

agg. = impotente (voce formata da dis- e possent, con prefisso rafforzativo)
Al somee che al sedi dispossent par frontâ la situazion.
Sembra sia impotente ad affrontare la situazione.

DISPÛS

avv. = dietro (costituito da dis- e pôst "poi")
Siore, e cjate il cjaliâr dispûs il giornâlâr.
Signora, trova il calzolaio dietro il giornaliario.

DISRODOLÂ

v. = srotolare (verbo formato da dis- e rodolâ "rotolare")
Disrodole il cartelon cussù o viodin alc.
Strotola il cartellone così vediamo qualcosa.

DISSIPÂ

v. = sciupare, guastare, danneggiare (dal latino dissipâre "gettare, spargere qua e là, disperdere, rovinare, sperperare", influenzato forse da decipere)
Mai dissipâ nuie, visital!
Mai sciupare nulla, ricordatelo!

DISTRIGÂ

v. = districare, sbrogliare; finire, spicciarsi (da dis- e trîcare "creare delle difficoltà")
Al è un mateç; al tocje distrigâlu un pôc a la volte.
E' un impiccio, bisogna sbrogliarlo un po' per volta.